

REGIONAL NEWS UNIT
ALL INDIA RADIO, AGARTALA
Date: 05-04-2024
Time: 07:55-08:05 PM Hrs
BENGALI EVENING BULLETIN

Headlines :

(১) পূর্ব ত্রিপুরা লোকসভা আসনে আজ মনোনয়নপত্র পরীক্ষা শেষে সবকয়জন প্রার্থীর মনোনয়নপত্র বৈধ বলে বিবেচিত হয়।

(২) মুখ্য নির্বাচন কমিশনার রাজীব কুমার নির্বাচিত জেলার পৌর কমিশনার এবং জেলা নির্বাচন আধিকারিকদের ভোটারদের অংশগ্রহণ বাড়ানোর জন্য বুথ-ভিত্তিক কর্মপরিকল্পনা তৈরি করার নির্দেশ দিয়েছেন।

(৩) বিজেপির বরিষ্ঠ নেতা, প্রধানমন্ত্রী নরেন্দ্র মোদি বলেছেন যে আজ সমগ্র ভারত একটি উন্নত দেশ হওয়ার সংকল্প নিয়ে কাজ করছে।

(৪) লোকসভা নির্বাচনের জন্য ইস্তেহার প্রকাশ করল কংগ্রেস।

Scrutiny-East Tripura Constituency :

২০২৪ সালের লোকসভা নির্বাচনের দ্বিতীয় পর্যায়ের ভোট গ্রহণে মনোনয়নপত্র পরীক্ষা কাজ আজ শেষ হয়েছে। তবে জম্মু ও

কাশ্মিরে আগামীকাল মননয়নপত্র পরীক্ষা করা হবে। পূর্ব ত্রিপুরা লোকসভা আসনে আজ মনোনয়নপত্র পরীক্ষা শেষে সবকয়জন প্রার্থীর মনোনয়নপত্র বৈধ বলে বিবেচিত হয়। উল্লেখ্য এই নির্বাচনে প্রতিদ্বন্দ্বিতার জন্য মোট ৯ জন প্রার্থী মনোনয়নপত্র জমা দিয়েছিলেন। বৈধ প্রার্থীরা হলেন বিজেপির কৃতি দেবী দেববর্মণ, সিপিআই(এম)-র রাজেন্দ্র রিয়াং, আই এন পি টি শিব চন্দ্র দেববর্মা। তাছাড়া নির্দল প্রার্থীরা হলেন কৃষ্ণ মোহন জমাতিয়া, দর্শন কুমার রিয়াং, কল্প মোহন ত্রিপুরা, শত্ৰুঘ্ন জমাতিয়া, সন্তুজয় ত্রিপুরা ও অর্চনা ওরাং। এই নির্বাচনে মনোনয়নপত্র প্রত্যাহারের শেষদিন আগামী ৮ই এপ্রিল। রাজ্য নির্বাচন দপ্তর সূত্রে এখবর জানা গেছে।

ECI :

মুখ্য নির্বাচন কমিশনার রাজীব কুমার নির্বাচিত জেলার পৌর কমিশনার এবং জেলা নির্বাচন আধিকারিকদের ভোটারদের অংশগ্রহণ বাড়াতে বুথ-ভিত্তিক কর্মপরিকল্পনা তৈরি করার নির্দেশ দিয়েছেন। তিনি তাদের শহুরে এবং গ্রামীণ এলাকার জন্য পৃথক পৃথক কৌশল তৈরী করতে এবং ভিন্ন ভিন্ন লক্ষ্য অনুযায়ী পরিকল্পনা করতে বলেন।

মুখ্য নির্বাচন কমিশনার আজ নতুনদিল্লিতে নির্বাচিত জেলা থেকে পৌর কমিশনার এবং জেলা নির্বাচন কর্মকর্তাদের সঙ্গে বৈঠকে একথা বলেন।

ভোটাররা যাতে স্বতঃপ্রণোদিত হয়ে ভোট দিতে আসেন, সে বিষয়ে শ্রী কুমার গুরুত্ব আরোপ করেন। তিনি বলেন যে ২১৫টি

গ্রামীণ এবং ৫১টি শহুরে সংসদীয় নির্বাচনী এলাকায় ভোটারদের উপস্থিতি কম রয়েছে।

General Observer-Kailashahar :

পূর্ব ত্রিপুরা সংসদীয় আসনের সাধারণ পর্যবেক্ষক শচীন্দ্র প্রতাপ সিং আজ সকালে কৈলাশহর সফর করেন। তিনি কৈলাশহরের রাধাকিশোর ইনস্টিটিউশনে নির্বাচনী স্ট্রং রুম, গননা হল পরিদর্শন করেন। সুচারুভাবে নির্বাচনী কাজ সম্পন্ন করতে যাবতীয় ব্যবস্থাপনা সরজমিনে পর্যবেক্ষণ করেন ও খতিয়ে দেখেন। তাছাড়া নির্বাচনী পরিচালনার আনুষঙ্গিক বিভিন্ন বিষয়ে সম্পর্কে অবহিত হন। তাছাড়া তিনি সংশ্লিষ্ট নানা বিষয়ে পরামর্শ ও দেন। পরিদর্শনকালে তাঁর সাথে ছিলেন, ঊনকোটি জেলার জেলা নির্বাচন আধিকারিক তথা জেলা শাসক দিলীপ কুমার চাকমা, পুলিশ সুপার কান্তা জানগির, অতিরিক্ত জেলা শাসক অর্ঘ্য সাহা, কৈলাশহরের মহকুমা শাসক প্রদীপ সরকার প্রমুখ।

এদিকে কৈলাশহর সার্কিট হাউসের কনফারেন্স হলে সাধারণ পর্যবেক্ষক শচীন্দ্র প্রতাপ সিং এর উপস্থিতিতে আসন্ন লোকসভা নির্বাচন উপলক্ষ্যে এক বৈঠক অনুষ্ঠিত হয়। এখানে নির্বাচন কাজের সাথে যুক্ত আধিকারিক ও কেন্দ্রীয় সশস্ত্রবাহিনীর পদস্থ আধিকারিকরা এতে অংশ নেন।

Expenditure Observer-North Tripura :

ত্রিপুরা পূর্ব লোকসভা আসনে নির্বাচন কমিশনের ব্যয় পর্যবেক্ষক রেউবেন ম্যাথু জেকবের সভাপতিত্বে আজ ধর্মনগরে উত্তর ত্রিপুরা জেলার জেলাশাসক কার্যালয়ে এক সভা অনুষ্ঠিত হয়। সভায় ব্যয় সংক্রান্ত পর্যবেক্ষক স্ট্যাটিক সার্ভেলেন্স টিম, ফ্লাইং স্কোয়াড, ভিডিও ভিউইং টিম, অ্যাকাউন্টিং টিম ইত্যাদি নির্বাচনী ব্যয় সংক্রান্ত বিষয়ে নজরদারি করার জন্য দায়িত্বপ্রাপ্তদের কীভাবে কাজ করতে হবে সে সম্পর্কে আলোকপাত করেন।

Expenditure Observer-Kailashahar :

নির্বাচন কমিশনের ব্যয় সংক্রান্ত পর্যবেক্ষক রেউবেন ম্যাথু জেকব আজ কৈলাশহর সার্কিট হাউসে আজ বৈঠক করেন। বৈঠকে নির্বাচনী কাজের সঙ্গে যুক্ত পদস্থ সরকারি আধিকারিকসহ B.J.P, কংগ্রেস ও C.P.I(M) সহ অন্য রাজনৈতিক দলের প্রতিনিধিরা উপস্থিত ছিলেন। প্রতিদ্বন্দ্বী ভোট প্রার্থীদের ব্যয়ের হিসাবপত্র রাখার বিষয়ে নির্বাচন কমিশনের নির্দেশিকা কঠোরভাবে মেনে চলার উপর বৈঠকে গুরুত্বারোপ করা হয়।

BJP-Lefunga :

বিদ্যুৎমন্ত্রী রতনলাল নাথ আজ মোহনপুরের লেফুঙ্গার অন্তর্গত জনজাতি অধ্যুষিত এলাকায় পশ্চিম লোকসভা আসনের বিজেপি প্রার্থী তথা সাংসদ বিপ্লব কুমার দেবের সমর্থনে প্রচারে যান। প্রচারকালে তিনি জনগণের সঙ্গেও নির্বাচন সংক্রান্ত বিষয়ে

বিস্তারিত আলোচনা করেন। উপস্থিত ছিলেন বিজেপি, আই পি এফটি এবং তিপ্রা মথা দলের কার্যকর্তাগণ।

BJP IT CELL SEMINAR :

প্রদেশ বিজেপি আইটি সেলের উদ্যোগে আজ আগরতলার নজরুল কলাক্ষেত্রে শঙ্খনাদ শীর্ষক রাজ্যভিত্তিক এক সেমিনার অনুষ্ঠিত হয়। উপস্থিত ছিলেন বিজেপির দলের বরিষ্ঠ নেতা তথা মুখ্যমন্ত্রী অধ্যাপক ডাঃ মানিক সাহা, প্রদেশ বিজেপি সভাপতি রাজীব ভট্টাচার্য, পশ্চিম ত্রিপুরা লোকসভা কেন্দ্রের বিজেপি মনোনীত প্রার্থী বিপ্লব কুমার দেব। লোকসভা নির্বাচনে বিজেপির আই টি সেল ও সোস্যাল মিডিয়া কিভাবে কাজ করবে তার দিক নির্দেশনা নিয়ে এই সেমিনারে আলোচনা হয়।

BJP-Rally :

পূর্ব ত্রিপুরা লোকসভা আসনের বিজেপি প্রার্থী কৃতি দেবী দেববর্মনের সমর্থনে আজ জোলাইবাড়িতে একটি বাই-সাইকেল র্যালি অনুষ্ঠিত হয়। সমবায় মন্ত্রী শুক্লাচরন নোয়াতিয়া, বিধায়ক সুশান্ত দেব প্রমুখ বাই-সাইকেল র্যালিতে নেতৃত্ব দেন।

CPIM-Campaign :

রামনগর বিধানসভা কেন্দ্রের উপনির্বাচনে ইন্ডিয়া জোট সমর্থিত সিপিআইএম প্রার্থী রতন দাস আজ আগরতলার দশমীঘাট

এলাকায় পদযাত্রা ও বাড়ি বাড়ি প্রচার করেন। এই কর্মসূচীতে উপস্থিত ছিলেন সিপিএম নেতা শংকর প্রসাদ দত্ত, অমল চক্রবর্তী ও কৃষ্ণা রক্ষিত প্রমুখ।

I.N.D.I.A Bloc-Kailashahar :

কৈলাসহরে আজ কংগ্রেস ও সি পি আই (এম) নেতৃবৃন্দের উপস্থিতিতে ইন্ডিয়া জোটের এক বৈঠক অনুষ্ঠিত হয়। উপস্থিত ছিলেন, বিধায়ক বীরজিৎ সিংহ, কংগ্রেস নেতা চন্দ্রশেখর সিংহ, C.P.I (M) এর কৈলাশহর মহকুমা সম্পাদক বিশ্বরূপ গোস্বামী প্রমুখ। আসন্ন লোকসভা নির্বাচনে ইন্ডিয়া জোটের প্রচার কর্মসূচি, জনসংযোগ ইত্যাদি বিষয়ে আলোচনা ও মতবিনিময় হয়।

PM :

বিজেপির বরিষ্ঠ নেতা, প্রধানমন্ত্রী নরেন্দ্র মোদি বলেছেন যে আজ সমগ্র ভারত একটি উন্নত দেশ হওয়ার সংকল্প নিয়ে কাজ করছে। আজ রাজস্থানের শেখাওয়াটি অঞ্চলের চুরুতে বিজেপি প্রার্থীদের সমর্থনে জনসভায় তিনি একথা বলেন। তিনি বলেন, গত দশ বছরে উন্নত ভারতের ভিত্তি তৈরি হয়েছে।

তিনি সরকারের বিভিন্ন পদক্ষেপে দেশের উন্নয়নের দাবী করে বলেন, করোনা সংকটের মধ্যেও ভারত বিশ্বের পঞ্চম বৃহত্তম অর্থনীতিতে পরিণত হয়েছে।

Congress, manifesto :

লোকসভা নির্বাচনের জন্য ইস্তেহার প্রকাশ করল কংগ্রেস। প্রতিদিন ন্যূনতম চারশ টাকা হারে জাতীয় ন্যূনতম মজুরির নিশ্চয়তা, প্রতিটি দরিদ্র পরিবারকে বছরে এক লক্ষ টাকা প্রদান, কেন্দ্রীয় সরকারি চাকুরিতে মহিলাদের জন্য ৫০ শতাংশ আসন সংরক্ষণ, ন্যূনতম সহায়ক মূল্যের জন্য আইনি নিশ্চয়তা এবং জাত ভিত্তিক লোকগণনা কংগ্রেসের ইস্তেহারের প্রধান বিষয়। কংগ্রেস সভাপতি মল্লিকার্জুন খার্গে এবং দলের বরিষ্ঠ নেতা সোনিয়া গান্ধী এবং রাহুল গান্ধী আজ নতুনদিল্লিতে নির্বাচনী ইস্তেহার প্রকাশ করেন।

BJP-Fatikroy :

B.J.P নেতা তথা মৎস্যমন্ত্রী সুধাংশু দাস আজ ঊনকোটি জেলার ফটিকরায় বিধানসভা কেন্দ্রের অধীন বিলাসপুর পঞ্চায়েত এলাকায় আসন্ন লোকসভা নির্বাচনকে সামনে রেখে বাড়ী বাড়ী প্রচার কর্মসূচিতে অংশ নেন। উপস্থিত ছিলেন, স্থানীয় গ্রাম প্রধান রতনমণি সরকার সহ দলীয় কার্যকর্তারা।

BJP-Ramnagar :

পশ্চিম ত্রিপুরা লোকসভা আসনের বিজেপি প্রার্থী বিপ্লব কুমার দেব ও রামনগর বিধানসভা কেন্দ্রে উপনির্বাচনের প্রার্থী দীপক মজুমদারের সমর্থনে আজ আগরতলার জয়পুর এলাকায় এক পদযাত্রা অনুষ্ঠিত হয়। উপস্থিত ছিলেন মুখ্যমন্ত্রী অধ্যাপক ডা: মানিক সাহা ও বিজেপি নেতা জসীমউদ্দীন।

CPIM Camping-Sabroom :

পূর্ব ত্রিপুরা লোকসভা আসনের ইন্ডিয়া জোটের সিপিআইএম প্রার্থী রাজেন্দ্র রিয়াং-র সমর্থনে আজ সাব্রুম মহকুমার মনুবনকুলে এক নির্বাচনী সভা অনুষ্ঠিত হয়। সভায় বিরোধী দলনেতা জিতেন্দ্র চৌধুরী, বিধায়ক সুদীপ রায় বর্মণ, প্রাক্তন বিধায়ক প্রভাত চৌধুরী প্রমুখ বক্তব্য রাখেন।

Mahila Morcha Rally :

বিলোনিয়ার বি.কে.আই ময়দানে আজ বিজেপির মহিলা মোর্চার ডাকে এক নির্বাচনী সভা অনুষ্ঠিত হয়। সভায় মুখ্যমন্ত্রী অধ্যাপক ডা: মানিক সাহা, পশ্চিম ত্রিপুরা লোকসভা আসনের বিজেপি প্রার্থী সাংসদ বিপ্লব কুমার দেব, বিজেপির প্রদেশ সভাপতি রাজীব ভট্টাচার্য ও মহিলা মোর্চার সভানেত্রী মিমি মজুমদার প্রমুখ বক্তব্য রাখেন।

Enforcement drive :

আগরতলায় রাস্তার পাশে যানবাহন বেআইনি পার্কিং এর বিরুদ্ধে ট্রাফিক পুলিশ আজ থেকে বিশেষ অভিযান শুরু করেছে। শকুন্তলা রোড, হরিগঙ্গা বসাক রোড, ধলেশ্বরে এই অভিযান শুরু হয়েছে। আগামী দিনেও এই অভিযান অব্যাহত থাকবে বলে ট্রাফিক পুলিশের পক্ষ থেকে জানানো হয়েছে।

CM-Condolense :

ৰাজ্যের প্রথম মুখ্যমন্ত্রী প্রয়াত শচীন্দ্র লাল সিংহের সহধর্মিণী লক্ষ্মী সিং আজ দুপুরে নতুন দিল্লিতে শেষ নিঃশ্বাস ত্যাগ করেন। মৃত্যুকালে তাঁর বয়স হয়েছিল ৯২ বছর। লক্ষ্মী সিংহের মৃত্যুতে শোক প্রকাশ করেছেন মুখ্যমন্ত্রী অধ্যাপক ডাঃ মানিক সাহা, কেন্দ্রীয় সামাজিক ন্যায় বিচার ও ক্ষমতায়ন প্রতিমন্ত্রী প্রতিমা ভৌমিক।

Belonia Senior Cricket :

বিলোনিয়া মহকুমা ক্রিকেট এসোসিয়েশন আয়োজিত সিনিয়র ডাবল লীগ কাম নক আউট ক্রিকেট টুর্নামেন্টের আজকের ম্যাচে দক্ষিণ বিলোনিয়া প্লে সেন্টার ২৭০ রানের রেকর্ড ব্যবধানে এস.বি.সি নগর প্লে সেন্টারকে পরাজিত করেছে। বিদ্যাপীঠ মাঠে অনুষ্ঠিত এই ম্যাচে প্রথমে ব্যাট করতে নেমে বিজয়ী দল ৩৫ ওভারে ৫ উইকেট হারিয়ে ৩৬৫ রান করে। জবাবে খেলতে নেমে এসবিসি নগর প্লে সেন্টার নির্ধারিত ২৪ ওভার ৫ বলে সব উইকেট হারিয়ে মাত্র ৯৫ রান সংগ্রহ করে। বিজয়ী দলের আকাশ দাস ৮৯ বলে ২০৩ রান করে এই ম্যাচে রেকর্ড সৃষ্টি করে।

**

T20 Cricket :

টিসিএ পরিচালিত সমীরণ চক্রবর্তী স্মৃতি ঘরোয়া টি-২০ ক্রিকেট প্রতিযোগিতায় আজ পাঁচটি খেলা অনুষ্ঠিত হয়। নরসিংগড়ের টিআইটি মাঠে অনুষ্ঠিত দুটি খেলায় চলমান সংঘ ৭ উইকেটে শতদল সংঘকে এবং স্ফুলিঙ্গ ক্লাব ৮৩ রানে হার্তে ক্লাবকে হারিয়ে দেয়। নরসিংগড়ের পিটিএ মাঠে অনুষ্ঠিত দুটি খেলায় জয়নগর ক্রিকেট ক্লাব ৮ উইকেটে বনমালীপুর ক্রিকেট ক্লাবকে এবং ইউনাইটেড ফ্রেন্ডস ১২৭ রানে মৌচাক ক্লাবকে হারিয়ে দেয়। এদিকে, এম বি বি স্টেডিয়ামে অপর খেলায় সংহতি ক্লাব ৯ রানে কসমোপলিটান ক্লাবকে পরাজিত করে।

Weather :

আগামী চব্বিশ ঘণ্টায় রাজ্যের পশ্চিম জেলা, সিপাহীজলা এবং খোয়াই জেলায় বিক্ষিপ্তভাবে বজ্র বিদ্যুত সহ বৃষ্টি সঙ্গে ঘণ্টায় চল্লিশ থেকে পঞ্চাশ কিলোমিটার বেগে ঝড়ো হাওয়া বয়ে যাওয়ার সতর্কতা জারি করেছে আবহাওয়া দপ্তর। বাকি সব জেলায় বিক্ষিপ্তভাবে বজ্র বিদ্যুত সহ বৃষ্টিপাতের সতর্কতা জারি করা হয়েছে। আগামীকাল আকাশ সাধারণত মেঘাচ্ছন্ন থাকবে। তাপমাত্রা সর্বোচ্চ পঁয়ত্রিশ ডিগ্রী এবং সর্বনিম্ন পঁচিশ ডিগ্রী সেলসিয়াস এর কাছাকাছি থাকবে। আজ দিনের সর্বোচ্চ তাপমাত্রা ছিল পঁয়ত্রিশ ডিগ্রী এবং সর্বনিম্ন ছাব্বিশ দশমিক দুই ডিগ্রি সেলসিয়াস।
